

Prebjegli vojnici ubili generala sirijske vojske

19 Jan 2012 Izmijenjeno 19:48 CET

Vojnici koji su odbili pucati na civile u četvrti Bab Kebli ubili generala vojnoobavještajnih službi Adela Mustafu, tvrdi opozicija



Jednomjesečni mandat posmatrača Arapske lige je pri kraju [Reuters]

Prebjegli vojnici koji su odbili poslušati naredbe da pucaju na civile u Hami, u Siriji, ubili su u četvrtak generala vojnoobavještajnih službi, doznaje se iz redova opozicije. "Generala vojnoobavještajnih službi Adela Mustafu ubili su vojnici koji su odbili da pucaju na civile u četvrti Bab Kebli", navodi se u saopćenju Lokalnih koordinacionih odbora. General Mustafa je "nadgledao više kampanja hapšenja i ubijanja", saopćili su odbori i precizirali da su vladine snage "opkolile četvrt Bab Kebli". Za vrijeme demonstracija na Fakultetu nauka u Halepu došlo je do sukoba između studenata i prorežimske milicije. Informacije ne mogu potvrditi nezavisni izvori jer su vlasti uvele drakonska ograničenja kretanja stranih novinara.

Vladine snage ubile najmanje 18 osoba

Sirijske snage sigurnosti ubile su u četvrtak iz zasjede četvericu vodećih prodemokratskih aktivista u provinciji Idlib, na sjeverozapadu zemlje, izjavio je Rami Abdel Rahman, čelnik Sirijske opservatorije ljudskih prava, za DPA. Aktivisti, čija se imena ne navode, ubijeni su u brdima u blizini granice s Turskom, saopćila je ta organizacija, sa sjedištem u Londonu. Aktivisti su ubijeni u brdima Džabal al-Zavija, u blizini granice s Turskom, kazao je Abdel Rahman. Ostali su ubijeni u Džabal al-Zaviji i u nemirnoj pokrajini Hama, u centralnoj Siriji, dodao je.

Aktivisti su ubijeni u brdima Džabal al-Zavija, u blizini granice s Turskom.

Opservatorija ljudskih prava je navela i da je u odvojenom incidentu tokom granatiranja grada Homs, u centralnom dijelu zemlje, ubijen jedan, a ranjeno sedam civila. U mejestu Deir Ezor nađeno je tijelo mladića koji je ubijen tokom antirežimskih protesta, a vladine snage su ubile vojnika koji je pokušao prebjeći na kontrolnom punktu u Daelu u provinciji Dara, navela je ta organizacija, prenosi AFP. Prema istom izvoru, snage sigurnosti su u srijedu ubile 13 civila, čime je povećan broj na 5.400 ljudi, koliko ih je, prema procjenama Ujedinjenih naroda (UN), od marta poginulo u Siriji, u gušenju protesta protiv predsjednika Bashara Al-Assada.

Izvor: Al Jazeera